

Asia Tenggara wilayah istimewa

UB · 12/3/2011 - A2

Oleh NIK JASNI CHE JAAFAR
nikjasni.ub@gmail.com

KOTA KINABALU: Asia Tenggara sememangnya adalah wilayah istimewa kerana kekayaan biodiversiti yang menjadi aset utama industri pelancongan di rantau ini, terutamanya di empat negara sub-rantau.

Justeru, pelancaran Unit Pembangunan Pelancongan Kawasan Pertumbuhan Asean

Timur-Brunei, Indonesia, Malaysia dan Filipina (BIMP-EAGA) mampu merancakkan lagi usaha penggalakan pelancongan di sub-rantau ini.

Mantan Presiden Filipina, Fidel V Ramos berkata unit terbabit yang bermatlamat untuk membangunkan pelancongan di rantau ini melalui penyediaan data yang lengkap tetapi pada masa yang sama tidak mengenepikan

usaha pemuliharaan dan perlindungan alam sekitar.

"Sub-rantau ini mempunyai tarikan yang sangat banyak dari aspek flora dan faunanya yang menjadi tumpuan dalam industri pelancongan di peringkat rantau dan global.

"Pertemuan pada hari ini amat penting sebagai salah satu platform untuk memastikan kerjasama tersebut dapat berjalan lancar," katanya ketika berucap di Majlis Pelancaran Unit Pembangunan Pelancongan BIMP-EAGA di Universiti Malaysia Sabah (UMS) kelmarin.

Pembantu Menteri Pelancongan Kebudayaan dan Alam Sekitar, Datuk Ellron Angin hadir sebagai tetamu kehormat mewakili Menterinya, Datuk Masidi Manjun.

Jelas Fidel, pelancaran unit itu bakal menyaksikan kerjasama erat antara negara sub-rantau dalam usaha meningkatkan prestasi pelancongan masing-masing.

"Sama ada untuk melihat keindahan alam atau membuat pelaburan, kehadiran pengunjung dari luar tetap memberi manfaat kepada sektor pelancongan," katanya.



KENANGAN...Kamaruzaman menyampaikan cendera kenangan kepada Fidel (tengah) sambil disaksikan Ellron (kanan).

Antara aktiviti yang dijalankan unit ini meliputi penyelidikan dan rundingan, penerbitan, pengajuran persidangan atau seminar, dan latihan serta perkongsian pengetahuan.

Sementara itu, Naib Canselor UMS, Brig Jen Prof Datuk Seri Panglima Dr Kamaruzaman Ampon berkata unit ini dicetus ketika persidangan BIMP-EAGA di universiti itu pada 2006.

"Salah satu objektif utama adalah untuk mewujudkan

pengkalan data dan penerbitan secara berpusat terutamanya berkaitan pembangunan pelancongan.

"Ini akan dapat memudahkan dan menggalakkan usaha pembangunan sektor pelancongan di negara anggota," katanya yang menambah, usaha ini juga dapat menjana pertumbuhan ekonomi di negara sub-rantau.

Katanya, idea baru dan kreatif adalah penting dalam membolehkan negara-negara

ini terus berhadapan cabaran semasa.

"Adakah sub-rantau ini dapat menerajui pembangunan sektor ini dengan mengadaptasi strategi berdasarkan data yang kukuh? Adakah ia boleh direalisasikan untuk mempromosi industri pelancongan di sini?

"Dengan penyelidikan yang kukuh, penyelesaian boleh dicapai bagi menjadikan pemain dalam sektor ini lebih agresif, inovatif dan kreatif," katanya.



LANCAR...Fidel (tengah) menandatangani plak sebagai simbolik pelancaran Unit Pembangunan Pelancongan BIMP-EAGA sambil diperhatikan Kamaruzaman dan Ellron (kanan).